

ISB'AB'EL CARTA YA' SAN JUAN

Komam Jesucristo ha' chi'aq'ni koq'inal

1 ¹ Chintz'ib'nhetojan hune' carta ti' teyet yunhe heyohtanhen tzet yelapno ye Komam Tzoti'^a chi'aq'ni Koq'inal. Komam ayxatik'a yet maxhto hunu tzet ye tu' chiwaxt'i yul sat yib'anhq'inal ti'. Wal xin hanh-kawonhanh jab'ehanh tzet kaw yal Komam tu', jilnipaxikojanh yinh Komam. Nahatil jil kob'ahanh yeb' Komam, kotzab'nipaxojanh Komam. ² Komam chi'aq'ni q'inale ti' isye isb'a jetanh, jilnihanh yinh Komam, yuxin chijako kob'ahanh jalnilojanh. Tinanh xin chijalanh teyet ta ha' Komam chi'aq'ni koq'inal mach istanhb'al. Isk'atanh Komam Dios ay Komam, yaj xin hulik'o yul sat yib'anhq'inal ti' isyeni isb'a jetanh. ³ Yuxin Komam jil tu'anah yeb' jab'ehanh tzet yala, ha' chijaltojanh teyet yunhe heyok jetb'ihojanh, hak tu' xin hunxanhe chijukano yinh Komam Dios Mame, yeb' yinh isk'ahol Jesucristo. ⁴ Yuxin chikotz'ib'nhetojanh hunteq'an tzoti' ti' teyet yunhe kaw tz'ajan chiyukaniko tzalahilal yinh janma.

Komam Dios issajilq'inal yehi

⁵ Wal tinanh xin, chijaltojanh teyet yinh kuyb'anile yalkano Komam Jesucristo jetanh. Yal Komam tato Komam Dios kaw issajilq'inal yehi, machi nich'ano q'ejholo yinh. ⁶ Tato chijala ta hunxa je yeb' Komam Dios, yaj ta chito kowaxt'e istx'ojal, chaliloj tato ayonhtoko xol q'ejholo, kaw leq'ti'onh, mach chikob'eyb'alnhe isyelal. ⁷ Komam Dios issajilq'inal yehi, yuxinto tato yinh issajilq'inal Komam Dios tu' chonhb'elwi, kaw jetb'ixa kob'a hununonh. Ha' xin ischik'il Komam Jesús, Isk'ahol Komam Dios, ha' chonhsajnhen yinh sunil komul.

⁸ Tato chijala ta machi komul, hanhkawonh chijaq' sub'chaho kob'a kochukil, mach xin ayonhiko yinh isyelal. ⁹ Tato chijalati komul tet Komam

^a 1:1 Jn. 1:1

Dios, chiyaq'kano tanho Komam komul jib'anh. Sunil komachiswalilal chiyikanilo Komam jinh, yuto istoholal chiswax'e Komam, yeb' xin sunil tzet chal Komam masan chij isb'a. ¹⁰Tato chijala ta machi komul chijakoj, lanhan jalni ta leq'ti' Komam Dios, kaw machi Istzoti' Komam yinh janma haka' tu'.

Komam Jesús ha' chitzotel jinh tet Komam Dios

2 ¹Wal hex kaw xahan ay wuhti'an, chintz'ib'nhetojan hunteq'an ti' teyet, yunhe mach cheyako hemul. Yaja' tato ay hunujonh chijako komul, ay hune' mak chaq' isb'a yok tzotelo jinh tet Komam Dios. Hune' mak tu', ha' ton Komam Jesucristo, Komam istoholalnhetik'a tzet chiswax'e. ²Ha' iskamikal, ha' tohlankano sunilal komul. Maxhnhetaj xin komul hanhonh ti' istohlakano Komam, to ha' hun ismul sunil anma ay yul sat yib'anhq'inal ti'.

³Ta chikoyije kuyb'anile aq'b'ilkano yu Komam Dios, chal yelapnoj hune' tu' ta xajohtanhelo Komam. ⁴Yaja' tato chijala ta kaw johtaxa Komam Dios, yaj ta mach chikoyije kuyb'anile aq'b'ilkano jet yu Komam, kaw leq'ti'onh chal tu', mach isyelal ayko jinh. ⁵Wal tato kaw chikoyije tzet chal Komam tu' xin, yinh kaw yeli hak tu' chu isyenilo isk'ulch'anil isk'ul Komam jinh yinh istoholal. Hak tu' xin chiyu johtanheniloj tato kaw hunxa je yeb' Komam. ⁶Ta chijala tato kaw hunxa je yeb' Komam Dios, kaw yilal kob'eyb'alnhen haka' tzet iswax'e Komam Jesucristo yet yek' Komam yul sat yib'anhq'inal ti'.

Hune' chejb'anile kaw yilal yehi

⁷Wuxhtaj, wanab', hune' chejb'anile chiwaltojan teyet ti', kaw mach ak'to heyab'eni. Kaw xatik'a hal-lax heyab'e' yettaxtik'a heyaniko heb'a yul isq'ab' Komam Dios. Kaw xin heyohtaxa hune' chejb'anile ti', hune' chihalni tato kaw yilal koxahannhen kob'a hununonh. ⁸Walka xin payxa aq'b'ilkano hune' chejb'anile ti', yaj haka' hunu kaw ak'to chiwute walnittojan teyet, yuto ha' Komam Jesucristo hul wax'enokano yinh kaw ist'inhanil. Lanhanpaxo xin isyenilo isb'a hune' kuyb'anile ti' texol, yuxin haxa hune' issajilq'inal, ha'xa chimujli yinh heyanna, hak tu' xin chu yelkano q'ejholo teyinh.

⁹Tato chijala ta kaw ayxako issajilq'inal Komam Dios yinh janma, yaj ta chito chíwa kok'ul yinh hunu juxhtaj maka janab', kaw aytoko q'ejholo yinh janma. ¹⁰Wal tato kaw xahan chijil juxhtaj yeb' janab', kaw ayxako issajilq'inal yul janma, matxa tzet chonhaq'ni ayk'ayoj. ¹¹Yaja' ta chichiwa kok'ul jinh hununonh, chaliloj ta ayonhtoko xol q'ejholo, yeb' ta lanhan kob'elwi xol q'ejholo tu', mach johtajo b'ay kaw kotokoj yuto q'ejholo tu' chi'aq'ni tanho komujlub'al.

¹²Hex xahan ay wuhti'an, chintz'ib'nhetojan hunteq'an ti' teyet, yuto xa'el hemul teyib'anh yu Komam Dios yu Komam Jesucristo. ¹³Hex

mame mi'e, chintz'ib'nhetojan hune' ti' teyet, yuto kaw heyohtaxa Komam ayxatik'a yet maxhto chiwatx'i yul sat yib'anhq'inal ti'. Haxpax tu' xin hex tzehtaj, kaw chintz'ib'nhepaxtojan hune' ti' teyet, yuto kaw xakexq'oji yinh naj matzwalil. Wal hex ak'to hex yinh Istzoti' Komam Dios, kaw chintz'ib'nhetojan hune' ti' teyet, yuto heyohtaxa Komam ay b'ey yul satkanh.

¹⁴Hex mame mi'e, chintz'ib'nhepaxtojan hune' ti' teyet, yuto kaw heyohtaxatik'a Komam ayxatik'a yet yalanhto maxhto chiwatx'i yul sat yib'anhq'inal ti'. Hex tzehtaj, kaw chintz'ib'nhepaxtojan hune' ti' teyet yuto kaw ay heyip heyaniko Istzoti' Komam Dios yinh heyanma. Yu hune' tu' xin, kexq'oji yinh naj matzwalil.

¹⁵Wal xin mach cheyako heyanma yinh hune' yul sat yib'anhq'inal ti', yeb' sunil tzet ay sat. Tato cheyako heyanma yinh tzet ay sat yib'anhq'inal ti', mach ayoko heyanma yinh Komam Dios, chal tu'. ¹⁶Yuto istx'ojal chiyaq' yul sat yib'anhq'inal ti', yettik'a yul sat yib'anhq'inal ti' yehi, maxhtaj yinh Komam Dios chitita, ha' ton xin hunteq'an ti': Istx'ojal tzet choche konimanil, yeb' istx'ojal tzet choche kosat yila', yeb'paxo kololo'nhen kob'a yinh tzettaj ay yul sat yib'anhq'inal ti'. ¹⁷Hune' yul sat yib'anhq'inal ti' yeb' sunil istx'ojal chaq'a, chi'apni istimpohal b'ay chitanhiloj, yaj tato ha' tzet choche isk'ul Komam Dios chikowatx'e, wal tu' ay koq'inal mach istanhb'al.

Eb'naj chisb'aliko isb'a Cristohal

¹⁸Hex kaw xahan ay wuhti'an chiwalan teyet, kaw ayonhxako yinh islahob'al tiempo. Hex ti' xaheyab'e ta chihul naj Anticristo, naj ayko ishowal yinh Komam Jesucristo. Yaja' tinanh xin tx'i'alxa eb'naj ayko ishowal yinh Komam xa'isyelo isb'a, yuxin chikonaloj tato kaw yinhxa islahob'al tiempo ayonh. ¹⁹Kaw koxol elna hunteq'an eb'naj tu', yaj yinh kaw yeli mach jetb'ihob'a kob'a yeb' eb'naj. Q'inalo tato jetb'i kob'a yeb' eb'naj, kaw machim ispohilo isb'a eb'naj koxol, jetb'imi kob'a yeb' eb'naj tinanh. Yaj kaw ispohilo isb'a eb'naj koxol yunhe isyenilo isb'a tato kaw mach jetb'ihob'a kob'a yeb' eb'naj.

²⁰Wal xin xayaq' Komam Jesucristo Komam Espiritu Santo jet, yuxin kaw kosunil johtaxa isyelal Komam Dios. ²¹Kaw chintz'ib'nhetojan hune' incartati'an teyet, maxhtaj yu mach heyohtajoj b'aytet isyelal Komam Dios, to kaw heyohtaxa; kaw heyohtaxapaxoj tato machi hunu leq'ti'al chitit yinh kuyb'anile isyelal chala.

²²Chiwalan teyet makta kaw leq'ti'wom tu', ha' ton mak chihalni tato Komam Jesús mach Cristohoj. Ha' ton mak tu' ayko ishowal yinh Komam, yuto mach chiyayto yul yanma yinh Komam Dios, yeb' yinh Isk'ahol Komam. ²³Ha' mak chihalni tato mach Isk'aholo Komam Dios ye Komam Jesucristo, kaw mach ayayto Komam yul yanma. Walpaxo mak chihalni

tato Isk'ahol Komam Dios ye Komam Jesucristo, ha' hune' mak tu' yet Komam yehi.

²⁴Ha' hune' kuyb'anile jab'e yettax janiko kob'a yul isq'ab' Komam Dios, kaw xin yilal wal yeko yul janma. Tato kaw wal yeko hune' kuyb'anile tu' yul janma, wal tu' hunelnhe jeko yinh Komam Dios, yeb'paxo yul isq'ab' Isk'ahol. ²⁵Ha' tzet halteb'ilkano jet yu Komam Jesucristo, ha' ton q'inal mach istanhb'al.

²⁶Kaw chintz'ib'nhetojan hunteq'an ti' teyet, yuto ay mak choche kex-yaq'a' sub'chahoj. ²⁷Wal hex hex ti', aq'b'ilxa Komam Espíritu Santo teyet yu Komam Jesucristo, yuxinto mach yechelto ay mak chexkuyni; yuto ha' Komam Espíritu Santo chexkuyni yinh sunil tzettaj ye tu'. Ha' xin kuyb'anile chaq' Komam Espíritu Santo kaw yeli, machi nino leq'ti'al ayko yinh. Yuxin kaw hunelnhehojab' cheyutekaniko heb'a yul isq'ab' Komam Jesucristo, haka' chute yalni Komam Espíritu Santo jet.

²⁸Tinanh xin hex kaw xahan ay wuhti'an, kaw hunelnhehojab' jeko yinh Komam Jesucristo yunhe mach chonhxiw tet Komam yet chihul hunelxa yeb' mach chonhtx'ixwikanh sataj yet chihul tu'. ²⁹Wal xin johtaxa tato istoholalnhetik'a tzet chiswatx'e Komam, yuxin tato kaw yinh istoholal chonhb'elwi, ha' chiyeniloj ta yuninal Komam jehi.

Kaw yuninalxa Komam Dios jehi

3 ¹Wal xin txumweloj yinh ta mach isb'i hanta kaw isxahanil ayonh yu Komam Dios, yuxin chonhyal Komam Dios yuninaloj. Wal anma yet yul sat yib'anhq'inal ti', kaw mach chiq'o'ji istxumniloj tato yuninalxa Komam Dios jehi. Hakpax tu' yaq'le Komam Jesucristo, maxhtik'a txumchalo yu anma tato Isk'ahol Komam Dios ye Komam. ²Hex wuxhtaj, hex wanab', hex kaw xahan ay wuhti'an, kaw yuninalxa Komam Dios jehi, yaj maxhto chisyelo isb'a sunil isk'ulal Komam chiyaq' jet. Kaw johtaj tato yet chihul Komam Jesucristo tu', kaw lahanxa chonheliko yeb'i, yuto chijila' yinh Komam haka' kaw yehi. ³Sunilonh ayko hune' tu' yipo k'ul chikosajne janma yinh istx'ojal, haka' Komam Jesucristo kaw machi nino istx'ojal yinh.

⁴Ha' mak chako ismul chismanhk'o kuyb'anile yet Komam Dios, yuto yet chijaniko komul, chikomanhk'o kuyb'anile aykano jet yu Komam.

⁵Johtaxa ta yu yinilo Komam Jesucristo mule, yuxin hulik'o yul sat yib'anhq'inal ti', machi xin nino ismul Komam. ⁶Yuxin hanhonh ayonhxako yul isq'ab' Komam matxa chikowatx'e istx'ojal. Wal mak chito watx'en istx'ojal, maxhto yohtajo Komam, maxhto chitxumchapaxo Komam yu. ⁷Hex xahan ay wuhti'an, mach cheyaq' sub'chaho heb'a tet hunuxa maka. Tato ha' istoholal chikowatx'e, kaw k'ulonhpaxo haka' Komam Jesucristo, yuto hanhk'anhe kaw istoholal iswatx'e Komam.

⁸Wal mak chito watx'en istx'ojal, kaw yet naj matzwalil yehi, yuto kaw

mulumtik'a naj matzwalil tu' yettax iswatx'i yul sat yib'anhq'inal ti'. Wal Komam Jesucristo Isk'ahol Komam Dios, hulik'o yul sat yib'anhq'inal yunhe yetanto ismunil naj matzwalil tu'.

⁹Hanhonh pitzk'anajonhxa yinh Komam Dios, matxa chikowatx'e istx'ojal, yuto ayxa isq'inal Komam yul janma, matxa xin chikowatx'e-paxo istx'ojal yuto yuninalxa Komam jehi. ¹⁰Hak tu' xin, chiyu isyenilo isb'a mak yuninal Komam Dios, yeb' xin mak yuninal naj matzwalil, yuto ha' mak mach chiwatx'en isk'ulal yeb' xin mach xahano chil yet anmahil, kaw mach yeto Komam Dios yehi.

Yilal koxahannhen kob'a hununonh

¹¹Hune' kuyb'anile ti' heyab'e yettax heyaniko heb'a yul isq'ab' Komam Dios tato yilal koxahannhen kob'a hununonh. ¹²Mach chijutewe kob'a haka' yute isb'a naj Caín, naj tu' yet naj matzwalil ye naj, yuto ismaq'kamo naj yuxhtaj. ¿Tzet yinh ismaq'kamo naj yuxhta tu'? Yuto kaw isk'ulal iswatx'e yuxhta naj, wal naj Caín tu' machiswalil tzet iswatx'e naj.^b

¹³Hex wuxhtaj, hex wanab', mach cheyaq' k'ayo hek'ul ta chichiwako isk'ul anma yet sat yib'anhq'inal ti' teyinh. ¹⁴Yet yalanhto, ayonhiko yul isq'ab' kamikal mach istanhb'al, wal tinanh xin, kaw xa'aq'lax hune' koq'inal mach istanhb'al. Kaw johta hune' tu' yuto kaw xahan chijil kob'a hununonh. Tato mach xahano chijil kob'a hununonh, kaw ayonhtoko yul isq'ab' kamikal. ¹⁵Tato chichiwa kok'ul jinh hununonh, kaw lahan yeb' maq'omkamo anmahonh. Wal hex hex ti' xin, kaw heyohtaj ta mach hunu naj maq'omkamo anma chischah isq'inal tet Komam Dios. ¹⁶Johtaxa tzet chalilo koxahannhen kob'a, yuto yaq'kamo isb'a Komam Jesucristo jinh; hakonhpax tu' hinanojab'onh jaq'ni kamo kob'a yinh hunu juxhtaj.

¹⁷Yaja' q'inalo ta ay hunu mak ay tzet aya, tonhe xin chil yek' yuxhta yinh manhtzetel, machi xin chikolwa yinh, chal yelapnoj tato kaw machi isk'ulch'anil Komam Dios yul yanma. ¹⁸Hex kaw xahan ay hex wuh-ti'an, kaw machnhehojab'taj koti' chalni ta xahan chijil juxhtaj, kaw yilal kokolwa yinh, hak tu' xin chiyu koyeniloj tato kaw xahan chijil kob'a hununonh yinh kaw isyelal.

Ayxako janma yinh Komam Dios

¹⁹⁻²⁰Hakton tu' xin, chiyu johtanheniloj tato kaw yinh ist'inhanil ayonhikoj, yuxin matxa chonhxiw yinh sat Komam Dios yet chitzotel janma tato ay hunu istx'ojal ayko jinh, yuto ek'b'al Komam kosataj, yohta Komam sunil tzet chi'ek' yul janma.

²¹Yaja' xin hex wuxhtaj hex wanab', hex xahan ay wuhti'an, tato kaw aq'ank'ulal ye janma, ta kaw machi kotx'ojal chijab'e, kaw mach

^b 3:12 Gn. 4:8

chonhxiw jok sata Komam Dios. ²²Hak tu' xin chaq' Komam sunil tzet chikoq'an tet, yuto chikoyije sunil ischejb'anil Komam, yeb' chikowatx'e tzet choche isk'ul. ²³Ha' ischejb'anil Komam Dios halb'ilkano jet, ha' ton janayto yul janma yinh Isk'ahol Jesucristo, yeb' xin koxahannhen kob'a hununonh, haka' yute yalnikano Komam jet. ²⁴Tato chikoyije tzet chal Komam, kaw ayxako Komam jetb'iho chal tu', yeb' ayonhxako yul isq'ab' Komam. Kaw xin johtaj tato ayko Komam Dios jinh, yu Komam Espíritu Santo xayaq' Komam jet.

Anma yet Komam Dios yeb' anma yet naj matzwalil

4 ¹Wuxhtaj wanab', tato ay eb'naj chalni ta ha' tzet chalik'oj yet Komam Dios yehi, kaw mach tonheho cheyayto tzet chal eb'naj tu' yul heyanna. Kaw b'ab'el cheyab'e istzotel eb'naj tato Istzoti' Komam Dios chal eb'naj, yuto kaw tx'i'al eb'naj leq'ti'wom yul sat yib'anhq'inal ti' chalni tato ischejab' Komam Dios yehi. ²Hak ti' chu hetxumniloj tato ayko Yespíritu Komam Dios yinh eb'naj, ta chal eb'naj haka' ti': «Kaw anma yute isb'a Komam Jesucristo yet yulik'o yul sat yib'anhq'inal ti',» ta xhi eb'naj, wal tu' ayko Yespíritu Komam yinh eb'naj. ³Wal mak mach chihalni yinh Komam Jesús haka' tu' xin, kaw mach ayoko Yespíritu Komam Dios yinh, ha' yespíritu naj chikajni Komam Jesucristo ayko yinh. Hune' espíritu tu' xaheyab'e tato chihuli, mach yetto b'aq'inh chihul hun tu', wal xin ayxak'o yul sat yib'anhq'inal ti' tinanh.^c

⁴Hex xahan ay wuhan, kaw yetxa Komam Dios je tinanh. Wal xin xakonhq'oji yinh eb'naj leq'ti'wom tu', yuto ek'na kaw ay yip Komam ayayto yul janma satapaxo naj ayko yul yanma anma yet yul sat yib'anhq'inal ti'. ⁵Kaw yet yul sat yib'anhq'inal ti' ye eb'naj, yuxinto hanhk'anhe tzet ay yul sat yib'anhq'inal ti' kaw chiyalob'tanhe eb'naj. Wal anma yet yul sat yib'anhq'inal ti', kaw saq'al yab'ento tzet chal eb'naj. ⁶Yaj walonh ti' xin, yetxa Komam Dios jehi, yuxin ha' mak ohtanhenxa Komam Dios, ha' chiyab'eto tzet chijala, wal anma mach yeto Komam Dios xin, kaw mach chiyoche yab'e' tzet chijala. Hak tu' xin, chiyu johtanhenilo makta ayko isyelal Yespíritu Komam Dios yinh, yeb' xin mak ayko yespíritu naj yahawil leq'ti'al yinh.

Kaw xahan ayonh yu Komam Dios

⁷Hex xahan ay wuhti'an, xahanojab' chijil kob'a hununonh yuto yinh Komam Dios chitit hune' koxahannhen kob'a ti'. Tato kaw xahan chijil kob'a hununonh, chal yelapnoj tato ayonhxako yuninalo Komam Dios, johtaxa Komam. ⁸Yaja' tato mach xahano chijil kob'a, kaw maxhto johtajo Komam Dios chal tu', yuto wal Komam Dios kaw xahan ay anma

^c 4:3 Mt. 7:15; 2Jn. 7 ^d 4:5 Jn. 15:19

yu. ⁹Isyelo Komam tato kaw xahan ayonh yu, yuto yati hunpilan Isk'ahol yul say yib'anhq'inal ti' yunhe yaq'ni koq'inal mach istanhb'al. ¹⁰Ha' xin chiyenilo tzet kaw yu konhyochen Komam Dios. Wal xin, kaw maxhtajonh b'ab'el koyelo jochen Komam Dios, to ha' Komam konhochen b'ab'el, yuxin yati Komam Isk'ahol yaq'ni isb'a yinh xahanb'alil, yaq'nikano tanho komul.

¹¹Hex wuxhtaj hex wanab', hex xahan ay wuhti'an, yilal koxahannhen kob'a hununonh, yuto hak tu' yu konhixahannhen Komam. ¹²Waxanhka maxhto hunu mak chi'ilni Komam Dios huneloj, yaja' tato xahan chijil kob'a hununonh, kaw ayko Komam yul janma. Hak tu' chu isyenilo isk'ul'al isk'ul Komam Dios jinh yinh istoholal.

¹³Hak ti' chu johtanheniloj ta ayonhxako yul isq'ab' Komam Dios, yeb' ta aypaxiko Komam yul janma, yuto xayaq' Komam Yespíritu jet. ¹⁴Yuto hanhkawonhanh jilanh yinh Isk'ahol Komam Dios, yuxinto chijalanh tato ha' Komam Dios anheti Isk'ahol iskolno anma ay yul sat yib'anhq'inal ti'. ¹⁵Maknhetik'a chalni tato Isk'ahol Komam Dios ye Komam Jesucristo, ayxako yul isq'ab' Komam Dios chal tu', yeb' ayxapaxiko Komam yul yanma. ¹⁶Hak tu' xin chu johtanheniloj kat janipaxayto yul janma ta kaw chonhyoche Komam Dios.

Wal Komam Dios, kaw chiyoché Komam anma, yuxinto ha' mak chixahannhe yet anmahil, kaw ayko Komam Dios yul yanma, yeb' xin aypaxiko yinh Komam. ¹⁷Hak tu' chu isch'ib' koxahannhen kob'a hununonh, yunhe yet chi'apni istz'ayikal hune' isya'tajil chihuli, mach chonhxiwkanh, yuto kaw haka' ye Komam Jesucristo, hak tu' jehik'o yul sat yib'anhq'inal ti'. ¹⁸Hayet chijochen Komam Dios yinh kaw ist'inhanil, wal tu' machi b'ay chalti isb'a xiwkilal, yuto yet chonhxiwi chonhnanon tet isya'tajil. Yuxin ta ay mak chixiwi, yinh hak tu' maxhto isk'ulch'anil isk'ul Komam yinh, yinh kaw istoholal.

¹⁹Walonh hanhonh ti' chijoche Komam Dios, yuto ha' Komam b'ab'el konhocheni. ²⁰Yaja' tato ay hunujonh chijal haka' ti': «Wal haninti'an kaw chiwochehan Komam Dios,» ta konhchi, yaj kaw kaj chijilpaxo juxhtaj, yinh haka' tu' leq'ti'onh. Yuxin tato mach chikoxahannhe hunu juxhta chijiliko yinh, ¿tzet xin chiyu jochen Komam Dios mach chijiliko yinh? ²¹Komam Jesucristo aq'nhekano hune' kuyb'anile ti' jet: «Ha' mak chi'ochén Komam Dios, kaw yilal isxahannhenpaxo yuxhtaj,» xhi Komam.

Ta ayko janma yinh Komam Dios chonhq'oji yinh sunil istx'ojal

5 ¹Mak chi'anayto yul yanma tato Komam Jesús, ha' Cristo Kokolomal, kaw yuninal Komam Dios yehi. Tato chijoche Komam Dios Mame chijochepaxo Isk'ahol. ²Hayet chijochen Komam Dios, kat xin koyijen tzet chala, kaw johtaj tato kaw xahan chijilpaxo sunil yuninal Komam. ³Tato chikoyije kuyb'anile aykano jet yu Komam, ha' chalni loj ta

chijoche Komam. Sunil kuyb'anile yet Komam tu' mach ya'tajo koyijeni. ⁴Yuxin sunil mak yuninalxa Komam Dios, chiq'oji yinh sunil istx'ojal ay yul sat yib'anhq'inal ti', yuto yet chijaniko janma yinh Komam Dios chonhq'oji yinh istx'ojal ay yul sat yib'anhq'inal ti'. ⁵Ha' mak chi'anayto yul yanma tato ha' Komam Jesucristo kaw Isk'ahol Komam Dios yehi, chiq'oji yinh sunil istx'ojal ay yul sat yib'anhq'inal ti'.

Oxeb' tzet chiyeniloj tato isk'ahol Komam Dios ye Komam Jesús

⁶Yet yulik'o Komam Jesucristo yul sat yib'anhq'inal ti', ah ha' iswi', yelpaxo ischik'il, ha' ton xin chiyeniloj tato Isk'ahol Komam Dios yehi. Mach tonheho hulik'o yaq'a' aho ha' iswi', to elpaxo ischik'il yet iskami. Ha' xin Komam Espíritu Santo testigo yinh hune' ti', yuto Komam Espíritu tu' isyelal chala. ⁷Ha' yul satkanh oxwanh mak chaq' isb'a testigohal yinh hune' ti', ha' ton Komam Dios Mame, yeb' Komam Tzoti' isb'i, yeb' xin Komam Espíritu Santo. Ha' oxwanh ti' hune'nhe yehi. ⁸Oxwanh mak xin chaq'paxo isb'a testigohal sat tx'o tx'otx' ti', ha' ton Komam Espíritu Santo, yeb' ha ha' yet yah ha' iswi' Komam, yeb' chik' maltoj yet iskam Komam. ⁹Chijab'eto yinh tzet chal komon anma, hajxam xin yinh tzet chal Komam Dios, to kaw ek'b'alto ay yelapno ye tzet chal Komam, wal xin ha' kaw Komam Dios chitzotel yinh Isk'ahol. ¹⁰Mak chi'anayto yul yanma yinh Komam Dios, lanhan yalni Komam Espíritu Santo yul yanma tato yel chal Komam yinh Isk'ahol. Wal mak mach chi'anayto yul yanma yinh Komam Dios xin, kaw leq'ti' Komam yul sat, yuto mach chiyayto yul yanma yinh tzet chiyal Komam Dios yinh Isk'ahol. ¹¹Hune' tzet chal Komam Dios, ha' ton koq'inal mach istanhb'al chaq' Komam; kaw xin yinhnhe Isk'ahol Komam ay hune' q'inale tu'. ¹²Yuxin ha' mak xa'ischah Isk'ahol Komam Dios yul yanma, kaw ay hune' isq'inal mach chitanhi. Yaj wal mak machi Isk'ahol Komam yul yanma xin, machi hune' isq'inal tu'.

Kaw johtaj tato ay hune' koq'inal mach istanhb'al

¹³Hex chab'ilxa Isk'ahol Komam heyu, chintz'ib'nhetojan hune' carta ti' teyet yunhe heyohtanheniloj tato ay heq'inal mach istanhb'al.

¹⁴Yuxin chikawxi kok'ul yinh Komam Dios, yuto ta chikoq'an hunu tzet ye tu' tet Komam haka' tzet choche isk'ul, kaw chab'e Komam tzet chikoq'ana. ¹⁵Yuxin ta kaw johtaj tato kaw chab'e Komam Dios tzet chijala yet chonhtxahli tet Komam, kaw johtapaxoj tato chiyaq' Komam tzet chikoq'ana.

¹⁶Tato chijila ta ay hunu juxhtaj maka janab' chako ismul, yaj mule mach chonhyito yinh kamikal mach istanhb'al, koq'anawe isk'ul-ul isk'ul Komam Dios yinh, kat xin yaq'ni Komam iskawil. Wal xin ay mule chonhinito yul isq'ab' kamikal mach istanhb'al, yinh hune' mule tu', kaw chiwalan teyet mach cheq'an isk'ulal Komam Dios yib'anh mak

chiwatx'eni, mach chiwalan teyet ta chehtxahli yinh. ¹⁷Sunil ismach-iswalilal, muletoni, yaj ay mule mach chonhinito yinh kamikal.

¹⁸Kaw johtaj ta makta yuninalxa Komam Dios yehi, matxa chissay yaniko ismul, yuto haxa Isk'ahol Komam Dios chitanheni. Yuxin kaw matxa chu yok naj matzwalil yetanoj.

¹⁹Kaw johtaj ta yetonhxa Komam Dios. Wal anma yet yul sat yib'anh-q'inal ti', kaw ayayo yalanh yip naj matzwalil.

²⁰Kaw johtapaxoj tato xahulik'o Isk'ahol Komam Dios, ha' Komam aq'nhe konab'al johtanhenilo Komam Dios yinh kaw isyelal. Yuxinto hunxa je yinh Komam kaw yel chala, ha' ton Komam Jesucristo. Isk'ahol Komam Dios tu', ha' Komam Dios yinh kaw isyelal, ha' chi'aq'ni koq'inal mach istanhb'al.

²¹Hex xahan ay wuhti'an, kaw nannhe heyu, mach chexoktzujno yinta tioxh yeb' sunil hunteq'an b'ay chi'ay jahno anma. ¡Hakojab' tu'!